

浮梁縣志卷之四

典禮

秩祀 羣祀附

鄉飲酒禮附

祀莫大於上丁釋菜是天下之所大同也胡以志曰加隆  
焉耳尊其所大同而後敢及其所不同祀之所以秩也祭  
法言德則祀之功祀之禦災捍患則祀之特牲言有所焉  
有報焉有由辟焉是俱敢以淫祀概之乎然則鄉之有飲  
也何以附曰凡釋奠必遂養老况禮有專屬乎然則又惡  
乎同曰飲酒之禮同而得與於斯禮之人仍吾邑也作典

禮志

文廟 制見學校



祭期順治二年定每歲以春秋二仲月上丁日雍正十年  
定前期執事人等致齋三日

樂奏康熙三十八年定正樂章改稱中和韶樂五十二年  
改造樂器審定黃鐘之度五十五年奏准平字樂章通行  
贊唱

迎神奏咸平

大哉孔子先覺先知與天地參萬世之師祥徵麟綬韻答  
金絲日月既揭乾坤清夷

初獻奏寧平

予懷明德玉振金聲生民未有辰也大成俎豆千古春秋  
上丁清酒既載其香始升

亞獻奏安平

式禮莫愆升堂再獻響協夔鋪誠孚壘獻肅肅雍雍譽髦  
斯彥禮陶樂淑相觀而善

終獻奏景平

自古在昔先民有作皮弁祭菜於論思樂惟天牖民惟聖  
時若羹倫攸叙至今木鐸

徹饌奏咸平

先師有言祭則受福四海鑿宮疇敢不肅禮成告徹毋疎  
毋瀆樂所自生中原有菽

送神奏咸平

鳧繹我我洙泗洋洋景行行止流澤無疆幸昭祀事祀事

孔明化戎蒸民育我膠庠

祝文 乾隆九年頌

維年月日某官某致祭於

至聖先師孔子曰維

先師德隆千聖道冠百王揭日月以常行自生民所未有屬

文教昌明之會正禮和樂節之時璧鐘鼗鼓咸格薦於馨香

泮水膠庠益致嚴於蓬豆茲當春秋仲祗率彝章肅展微忱

率將祀典以

復聖顏子

宗聖曾子

述聖子思子

亞聖孟子配

省牲乾隆四年頒定前期一日承祭官至文廟觀樂果具

朝服上香行三跪九叩頭禮畢至省牲所香案前獻爵奠

酒揖牽牲取血執事生捧送各壇供奉承祭官俟安設果

一揖退

陳設雍正三年定大成殿正位祭品添設大牢乾隆四年

頒發文廟各壇陳設諸圖於學

先師神位前

爵三牛一羊一豕一帛一登一釂二簋二簋二籩十豆十

酒罇一

四配神位前

爵三羊一豕一釧二簋二籩二蓬八豆八酒罇一帛一

十二哲神位前

爵各一豕一釧各一簋各一籩各一蓬豆各四豕首一酒罇一帛一

兩廡神位

爵各一豕首一豕肉二酒罇三每案簋一籩一蓬四豆四

帛一

正獻分獻官

文廟正獻令主之分獻教諭訓導主之

乾隆四十四年四月准縣移為請定代縣主祭之例等事

奉

撫憲卹 批藩憲詳據南昌府湯議龍泉縣教諭喻宗華

稟縣公出應委何員代祭一案緣由奉批如詳通飭各屬

一體遵照繳等因嗣後凡遇丁祭

文廟印官公出教官代充正獻其餘一切祭祀均歸縣丞代

祭均不得攙越爭競毋違切切

誕日

至聖先師孔子誕辰雍正五年定每年八月二十七日恭值此

日文武官致齋一日不理刑名禁止屠宰

崇聖祠 制見學校

祭期與文廟同齋戒同

祝文 乾隆九年頒



維年月日某官某致祭於

肇聖王

裕聖王

詒聖王

昌聖王

啟聖王曰維

王奕葉鍾祥光開聖緒盛德之後積久彌昌凡聲教所覃敷

率循源而溯本宜肅明禋之典用申守土之忱茲屆仲秋

率修祀事配以

先賢顏氏

先賢曾氏

先賢孔氏

先賢孟孫氏

陳設雍正元年定每歲春秋牲牢酒醴遵豆簋蓋每位俱

照

啟聖王例陳設正五位帛各一爵三羊一豕一釗一簋二蓋

一蓬八豆八酒罇一

配位每位帛一爵三豕肉豕首一蓋一簋一蓬四豆四酒罇

一

兩廡每二位只帛一每位爵三豕肉一蓋簋各一蓬豆各四

酒罇一

名宦鄉賢二祠制俱見學校

祀期同文廟

祝文 乾隆九年頌

維年月日某官某致祭於

名宦之靈曰惟

竊文武憲邦公忠體國當

皇朝之肇造心膂攸同值

列聖之丕承股肱作輔明良合德奮庸而庶績咸熙中外宣猷

敷澤而兆民永賴洵屬廟廊之碩望允宜俎豆以明禋考

續紀勲崇報昭垂於令典陳杜奠幣馨香祇薦於歲時尚

饗

忠義孝弟祠 制見學校

祭期陳設同鄉賢

祝文 乾隆九年頌

維年月日某官某致祭於

忠義孝弟之靈曰惟

竊稟賦貞純躬行篤實忠誠奮發貫金石而不渝義聞宣

昭表鄉閭而共式祈事懋彝倫之大性摯菴蒿克恭念天

顯之親情殷棣夢模楷咸推天懿

綸恩特闡其幽光祠宇維隆歲時式祀用陳尊簋求格几筵尚

饗

節孝祠 制見學校

祀期陳設同忠義

祝文 乾隆九年頌

維年月日某官某致祭於

節孝之靈曰惟

靈純心皎潔令德柔嘉矢志完貞全閨中之亮節竭誠致敬彰閭內之芳型茹冰蘖而彌堅清操自勵奉盤盥而匪懈篤孝傳徽

綵綸特沛乎殊恩祠宇昭垂於令典祇循歲祀式薦尊膠尚

饗

壇廟

社稷壇在小南門

即戊巳門又名水南門通志謂在治西水南關是也

外大道右宋政

和元年頌社稷壇式東社西稷居前東風伯西雨師居後

有齋亭屋周垣七十丈五尺咸淳中置祭器元因之至治

二年知州高翔修明洪武間知縣夏閔即舊址重建為社

稷壇東西二十六丈七尺南北四十二丈五尺繚以周垣

有神厨宰牲房水池後惟址存雍正十年知縣沈嘉徵重

修

祭期順治初年定每年春秋仲月上戊日祭

祝文

維年月日某官某致祭於

社

稷之神曰維

神奠安九土粒食萬邦分五色以表封圻育三農而蕃稼穡



恭承守土肅辰明禋時屆仲春敬修祀典庶九九松柏華  
磐石於無疆翼翼黍苗佐神倉於不匱尚

饗

風雲雷雨山川壇在溪南宋元合祭於社稷明洪武間知縣  
夏閔別創壇於溪東清源觀後東西一十九丈南北四十  
丈五尺嘉靖三十四年知縣黃森移建溪南山麓惟址僅  
存後復就溪東故地為壇雍正十一年知縣沈嘉徵改溪  
南建壇如制

國朝順治初定風雲雷雨山川并城隍之神其為一壇祭期  
與社稷同

祝文 乾隆九年頌

維年月日某官某致祭於

風雲雷雨

山川

城隍之神曰維

神贊襄天澤福佑蒼黎佐靈化以流形生成永賴秉氣機而  
鼓盪溫肅依宜磅礴高深長保安貞之吉憑依鞏固寶資  
捍禦之功幸民俗之殷盈仰

神明之庇護恭修歲祀正值良辰敬潔豆籩祇陳牲幣尚

饗

先農壇在溪南顯教山雍正四年知縣張景蒼奉文創建有  
廟有壇有藉田而尋壞於風雨乾隆元年知縣沈嘉徵敬



謹修葺每歲正印官率屬員耆老農夫致祭行耕藉之禮  
辨祭銀六兩或動支地丁或請領司庫藉田谷價

祭期每歲仲春亥日先期致齋三日

祝文乾隆九年頌

維年月日某官某致祭於

先農之神曰維

神肇興稼穡粒我烝民頌思文之德克配彼天念率育之功

常陳時夏茲當東作咸服先疇洪惟

九五之尊歲舉

三推之典恭膺守土敢忘勞民謹奉彝章聿修祀事惟願五風

十雨嘉祥恒沐於

神庥庶幾九穗雙歧上瑞頻書於大有尚

饗

雩祭

國朝乾隆七年御史徐以升奏古有雩祭之典逢亢旱則又

有雲請做古禮每年屆期擇吉日致祭偶遇亢旱即於此

望告嶽瀆海鎮及山川能出雲雨者倘雨水過多請照祭

法祭祭水旱之例亦於雲壇致禱停止僧道諷經下禮部

議直省府州縣衛孟夏擇日行常雩禮或有亢旱亦皆七

日先祭界內山川次祭社稷不雨仍祈禱如初但不得用

大雩之禮亦不必另設雩壇其社稷藉田等壇壇可以恪

共將事其或雲潦為災則伐鼓用牲崇祭城門以祈晴霽

但照舊行儀注乾隆二十一年奉文所需祭品照例陳設  
每州縣酌用祭銀五兩

祝文 乾隆九年頒

維年月日某官某致祭於

社

稷

先農

山川之神曰恭膺

詔命撫育羣黎仰體

彤廷保赤之誠勤農勸稼俯惟葑屋資生之本力穡服田令甲  
爰頒肅舉祈年之典惟寅將事用申守土之忱黍稷維馨

尚冀明昭之受賜來牟率育庶俾豐稔於蓋藏尚

饗

禋祭

國朝乾隆七年定每歲遇有靈潦為災恭行禋祭之禮各官  
齋戒禁止屠宰用午時於南門水集最湧之處南向設城  
門神位望祭其陳設不用牲幣惟陳酒脯籩豆之屬儀用  
小祀祭畢眾擊鼓凡三百三十為一通連擊數十通而  
退如七日不晴仍致祭如前  
祝文 乾隆九年頒

維年月日某官某致祭於

城門之神曰

詔命臨民職司守土惟兆人之攸賴並藉

神功奠四序之常調犀蒙福蔭必使兩賜應侯爰占物阜而  
民安庶其寒燠咸宜共慶時和而歲稔仰靈樞之默運幸  
集嘉祥襄元化以流形俾無舊害尚

饗

關帝廟

舊建在南隅街西乾隆廿二年知縣陳大經合闕邑  
將舊基地易熊姓街東之地重建召僧奉祀香火

國朝順治九年

勅封忠義神武關聖大帝雍正三年定每歲五月十三

并春秋仲月共三次致祭動帑項銀四十兩

祝文 乾隆九年頌

維年月日某官某致祭於

忠義神武關聖大帝曰維

帝浩氣凌霄丹心貫日扶正統而彰信義威震九州完大節

以篤忠貞名高三國

神明如在禱祠宇於寰區靈應丕昭薦馨香於歷代屢徵異  
蹟蹟佑羣生恭值嘉辰遵行祀典筵陳籩豆几奠牲醪尚  
饗

陳設與文廟正位同

關帝後殿雍正三年加封三代每歲三祭與關帝同承祭官  
及各官俱行二跪六叩禮

祝文

維年月日某官某致祭於



闡帝之

曾祖光昭公

祖裕昌公

父成忠公曰維

公世澤貽麻靈源積慶德能昌後萬生神武之英善則歸親

宜享尊崇之報列上公之封爵

錫命優隆合三世以肇禋典章明備恭逢詠吉祇事薦馨尚

饗

邑屬壇在北郭蓮荷塘側明洪武間知縣夏閱達嘉靖二十

一年知縣汪宗伊修東西二十八丈一尺南北一十六丈

七尺有宰牲房三十四年知縣黃森改建於寶積寺山之

南後惟址存雍正十一年知縣沈嘉徵仍建於蓮荷塘側

以上俱列秩祀遵 憲頒式

城隍廟在縣治東三十步元為州城隍廟皇治二年知州高

翔修建趙鎮遠有記

記曰浮梁州城隍廟在州治之左巋然特峙西山環揖雙

溪迴抱俯視闐闐若几席距州治三十步僅隔一垣公堂

之頰笑吏舍之喧寂訟辯之枉直獄繫之淹留神視聽在

焉國有詔命長吏致祝必先詣廟下境有水旱疾癘必禱

焉歲久宇陋延祐二年八月札帖木兒監郡公事至邑初

謁廟感瞻若有建於己者由是度用費鳩集眾力伐木負

植備就事時知州高公翔同知史公薦州判黃公端皆樂

為之至治二年壬戌經始重蓋前殿改作東序增重樓廣內外翼先是未有寢室謀創四楹以六月丙辰立柱卷土累基甃石環堵塗以丹雘廟前行路偏仄流水建甬注公率衆力開地袤五尺許修六十文有奇培築堅卓址勢益隆摩公不煩事逸功倍三年癸亥正月望日陳奠告成棟宇既杜蓮豆孔嘉

明洪武四年知縣王文德重建永樂十年知縣王徵修正統十年知縣趙應復修宏治元年知縣何文英重建戴珊有記

記曰浮梁縣治東城隍嶺在馬廟據嶺之巔祀城隍之神面陽背陰右隆左殺山谿縈迴與縣等開創舊矣在元為浮梁州廟我國朝復州為縣正統中廟久入於蔽蔽乙丑知縣晉江趙君應撤而新之既而吏怠民欺庶政缺失環廟而宅者蕃以逼厥址日感成化丙午堂廡門道敝甚人神兩渙而災害如所謂水火盜賊者適有羊城何君文英以進士知縣事重為此懼偶按察僉事錢君山來巡時何君具白之以為然黃瑛輩相與誓神而後從事自城市以達於鄉鎮一唱百和施予得銀若干兩易竹木磚石灰鐵油漆及食粟各若干根塊酌石傭工役徒又若干日用調度有方出納有稽雖木屑竹頭殘磚折棟一切不棄於無用中為正堂後為寢室而聯以過舍二十三間前置重門旁翼兩廡三十二間飾以雜采繪以周垣樹以佳木門左

右故址悉復如額宏治改元歲戊申訖工規制均適大異  
舊觀神祠以寧人心以攝渙散以萃而災害平矣

十二年火知縣左輔建正德十五年知縣劉守愚修嘉靖  
二十一年知縣汪宗伊建兩序繇以垣又毀像易以木主  
旋復塑像邑人盧瓊記之

記曰汪侯少泉為政二年工首學校次開陰陽醫學申明  
亭與縣治後凡侵地皆復之一日持城隍廟碑刻與圖示  
予曰周禮頒祀於邦國都家鄉邑今之城隍其一耳筆仕  
有司者祭而誓誓而後任制也其官之廉墨仁暴政之善  
惡惟神是司其闕匪輕斯廟也初年樸素卑陋基址空敞  
宏治戊申改作之暨己未火惟建一堂兩廡視初年卑陋

空散尤甚廟之內外隙地為環居之民侵逼尤多有司漫  
不之禁豈以神不靈於廉墨仁暴善惡之報故置而不問  
歟按圖地形裕於前而殺於後南北為縱計三十丈橫四  
分為中度之寢前簷下東西若干正堂前簷下東西若干  
蓋取復之額如舊矣茲於北邊築土環堵而覆以瓦南則  
葺舊門而飾其偏一面皆抵通衢無足慮者於西也官運  
磚若干砌垣高若干於東也民地卑下懸絕自相為限東  
南旁地官以磚垣三圍之立社學於中通門與路於學東  
卑地署為別次以翊於廟西南旁地令廟丁治圃以司香  
火又新兩廡十八間是欵四維而聯屬之侵竊之患庶幾  
免乎哉予曰免矣然物之成毀有時官吏賢否不一昔也



門堂寢廡森嚴綬迴刻石以防必謂無恙安知今日之為  
顏垣敗壁榛莽瓦礫雖碑石惡其害已而毀之而官不之  
恤哉侯修廢復舊煥然哉然是必無恙又安知後日之不  
為今者哉然則如之何可守也夫人者心也神則理也昔  
衛遷帝邱夏相奪康叔之享於數百年之後而衛卒不競  
蓋居非其有也天下豈有不愛子孫之祖考者哉又豈有  
不教祖考享祀之子孫者哉無是心與聞是言而不懼者  
皆非人也則神奪其享理也其家之不競與衛之不競一  
也雖然侯嘗毀康王等淫祠市鄉共五百餘所悉改為社  
學獨於此是崇何吁此為政之所以善也予見其治民淑  
者賞之貧者恤之弱者扶植之恐陷於有過則訓以約之

至於義刑義殺一無假借善惡之分也凡神有功於民則  
祀之不在祀典者逐之邪正之辨也去惡恐其傷善也去  
邪恐其亂正也邪去則正益崇正崇而神之原墨仁恭善  
惡之報自有不容揜者以是二者守之則民之侵竊庶幾  
免乎哉然則斯功也可以攝伏人心於不朽也哉

嘉靖三十一年知縣朱景賢重修三十五年知縣黃森修  
萬曆三十一年知縣周起元重建戒壇顏曰質諸

國朝乾隆二十六年闔邑紳士里民重修

馬王廟在南隅康熙十九年守備胡尊德建

大神廟在南隅乾隆三十六年浮梁營公建

金公祠在縣治儀門左祀唐令金安及子叔彥叔遵舊制春

秋二祭夫公費錢糧今無明嘉靖廿一年知縣汪宗伊修  
二十三年燬知縣楊僕重建萬厯間修調令徐學聚記之  
記曰萬曆之十有一年余以進士受浮梁令甫至邑見儀  
門左有所謂金公祠者詢父老何神曰此故唐時邑父母  
也稱述功德甚備余心竊嚮往焉謁之日則見祠宇圯壞  
輒願語僚屬曰邑有世忠而不彰非有司之過歟謀捐俸  
新之亡何奉命調吉水不克遂厥志以行逾年公裔孫宗  
舜具呈巡按御史許西孫公念公父子有守土死難之功  
允其請令重建崇祀委丞劉君應堅董其事暨成撫院心  
谷陳公楊山莊公按院鑑塘朱公浩峰祝公潤滄劉公學  
道東霍沈公守道密與蔡公巡道襟宇顧公郡伯鳴陽劉

公後先協議檄縣歲春秋致祭劉丞謂此余志也遣吏報  
成於余偕司成公星橋家嗣冠石公來干余紀其畧余度  
無所事辭因宰劇邑坐刀筆冗未遑也今荷聖天子簡擢  
諫垣政當表此以風海內乃援筆記之按公諱安字曰安  
京兆人漢乾祐後也唐咸通舉進士為浮梁令乾符間丁  
逆巢之亂從民溪東南城築險自守閩境賴以全活留治  
十七年授檢校尚書右僕射昭信軍節度使時朝廷以槍  
擄之秋非世守不能安集因勅公長子叔彥公為令與叛  
黨劉建鋒戰死於陣贈檢校尚書左僕射復表次子叔遲  
公繼令以靜寇亂民不忍釋遂家焉卒之日民乃創祠邑  
儀門左而世祀之嘉靖間家宰少泉汪公來治邑首以公

父子功備登祀錄改祠向南尊以黜樓大延愷都給事中  
肅庵楊公來復建之比部即曉峰黃公修邑誌贊曰巢賊  
驛騷逼我境挺卓彼金公保民守圍此屹長城凜凜戰鏗  
父子相繼四十餘年德澤久施載登祀篇遺風不泯鴻名  
益傳今孫公又為新其祠莊劉諸公又為延其祭見崇德  
報功之心千載有同然者竊嘗考秩祀之典以死勤事則  
祀以勞定國則祀能禦大災捍大患則祀安公築險活眾  
有捍患之勛矣彥公冒陣死敵有死事之忠矣進公靖寇  
安民有撫定之勞矣且臣子宣力國家不難於清平而難  
於板蕩公父子相繼四十年間僭亂接踵乘輿播遷人各  
懷心而獨救身保境內全府庫此其報唐之忠與日月爭

光可也其世不失祀也宜哉載觀公嗣孫若鼎臣汝臣純  
臣君著君佐君卿君佑兄弟父子皆舉進士而志寧從龍  
去偽以經術節義馳聲奕世至星橋後以文章大魁海內  
天之報施善人蓋未艾也嗚呼後之觀茲祠者忠王愛民  
之心可以興矣所闡風教豈曰小補之哉余雖未獲告落  
而初志已遂謹次顛卒俾勒之麗牲之石以誌不朽  
國朝康熙二十一年知縣張琬為立祀田有記

記曰自古名臣保障一方其生也精神聚民社之間其殛  
也英靈貫天地之際故奕世血食弗替而人之奉之千載  
如一日康熙二十有一年余補浮梁令甫至之日見儀門  
左有金公祠者詢之知為唐時故令也千餘年間廟貌猶



存香火尚在竊私念曰南國之棠峴山之石古之功德及人昭垂不朽者大率類是乃閱誌書迹其事實而公父子相繼治浮四十餘年宜乎建祠崇祀前之院司監守後先協議尊之如獄濟邑之縉紳士民朝夕瞻禮事之如生存豈其當吾世而忽諸考公之治浮也丁黃巢之亂徙險固守全活圍境捍禦之功偉矣彥公之治浮也當劉建鋒之叛親冒矢石慷慨捐軀死事之忠顯矣遜公之治浮也承久亂之後靖寇除殘安民和衆撫定之勞著矣禮曰以死勤事則祀以勞定國則祀能禦大災則祀能捍大患則祀有一於此祀無不宜公父子且兼之又何疑於祀典哉夫公父子之報唐如此其忠且盡則浮之所以報公者何可

不謀其久禮曰惟士無田則亦不祭既宜於祀矣而無世祀之田非後人之過歟余俸薄捐無幾何聊置數畝以為年年蘋藻之薦庶不失世祀之意可也不寧惟是公卒之日莖邑治後越唐而宋而明兵燹頻仍邑治廢興不知幾更修築者浸澗相沿實偏處此茲移宰署退一舍使後壘寬厥庶幾松柏有路人之禮之者謁其祠并武其墓勿翦勿伐居然南國之棠也隕涕潑淚依然峴山之石也今而後公之墓與祠不並顯乎邑士大夫曰是役也不可以不記乃援筆記之按公諱安字曰安京北人漢乾侯後也唐咸通間登進士為浮梁令在治十七年陞婺饒杭睦四州都統使贈檢校尚書右僕射昭信軍節度使子叔彥襲為

令贈檢校尚書左僕射次子叔遲繼為令遂家焉蓋是時朝廷重世守之勲而浮民亦愛戴之篤也公甫歿後民即創祠邑儀門左而祀之迨明嘉靖間汪公少泉以公父子登祀錄改祠南向尋大楊公復建之孫公繼新之黃公修誌贊之莊劉諸公皆立祭庭之北見崇德報功之心古今有同揆者觀公家淳之後奕世簪纓綿綿益繁以經術節義馳聲史冊者不可勝數天之報施善人固未有艾豈特浮民之崇報弗替已哉余固畧序始末俾勒之貞珉以誌不朽共祀田數目并附計開王師塢貳坵三十六畝汪坑口貳坵叁拾畝家莊壹坵壹拾叁畝黃坵壹拾伍畝畢家塢肆拾畝以上共計老祖壹百三十四畝

乾隆三十四年知縣楊長桂重建金公祠并記

記曰浮屠儀門左舊金公祠祀唐令金安以子叔彥叔遲為配廟貌赫奕奉祭惟謹越今數百年矣唐自逆巢之亂四方流毒望風納款者恐後公獨從民禦賊闔境生全父子相繼為治保障昌江其精忠大節至今天下學士大夫以及牧豎蚩夫皆能道之第觀其廟宇棟柱摧折垣墉頽頹非所以妥侑忠魂勸獎人心之盛也况爾來琳宮梵宇所在金碧莊嚴而金公祠無議及者有心世教不禁為之長太息矣金公後裔欲謀新之予樂聞此舉但力薄費繁尚賴羣公共成盛事人倫天道明訓昭垂凡具秉懿應有同志務伴規模闔厥俎豆一新登堂拜謁俾見日星之常

存凜英魂之如在後之覽者亦知吾浮人士識所重輕不至崇異端而忘大義也是為記

楊副使廟明嘉靖廿一年知縣汪宗伊燬淫祠鎖人以祀楊副使紹芳邑人盧瓊記之

記曰嘉靖庚子夏吾邑大水自祁來加以山峭水駛又驟雨連日夕水忽高數丈餘縣不沒者五嶺衝突泛溢鄉隅抵景德鎮室廬蕩析者無算民抱屋漂流叫號徹兩岸沉溺相繼者亦無算雜阻儀劬掠以為食越三日樂之民居鎮者亂馬鎮民與格關死者又無算適公以分巡至乃大發倉糧若干銀若干分害之輕重給散有差而禦奪稍息格關之祠主議者欲加罪於鎮根連株條又無算皆歎

掩襲之夫鎮乃五方之民厯馬主客無慮十萬餘人人自危圍不思亂官一捕之急則變作矣公曰殺人以媚人吾不為也乃謁議者曰刑不必濫惟其當以政和民不聞以亂亂猶治絲而棼之也議者二馬調他道守巡參聽之公據臂進曰何至是哉德不失衆度不失事義則仕否則奉身而已專祿周旋配也僉重違公議久之曰然唯水圖哉公以身任之死者堊之傷者治之散者集之反側者安之屬五方之民而告之曰毋倚乃身迂乃心毋咻厥威用畜汝衆屬鎮之民而告之曰毋怙爾終終損爾備用散厥積用保無虞屬商賈而告之曰完爾館高爾閤毋暴爾輸載各瞻所事咸稽首曰喏解頰而散用是市不易肆工不易



業不半月亂平鎮民欲生祀公而公歿矣乃取牲帛走奠復謀立廟欲公血食而苦無隙地適汪侯少泉毀淫祠五百餘所崇正抑邪民宗其化衆告於侯以五王廟為公祠侯端人也素慕公之端忻然從之置官租銀若干為春秋祭儀專掌於官以杜侵漁侯為祭文刻於石民乃求記於余或曰民不祀非族公楚之豪傑歿而有知顧享此哉余曰不然天下惟義與禮公卓思慮群疑以救一方之民義也民之於公觸事必思飲食必祝禮也禮義理之歸人神之會也昔柳柳州廟於羅池而英見張益州像於靜衆寺而至今不泯皆以是也况有功於民則祀何公之不享也公諱紹芳應城人以進士累陞江西按察司副使

明  
賢侯祠在縣治西祀有司之賢者祭期儀物同名官現祀

邑侯汪宗伊號子衡崇陽人

邑侯蕭奇勳號懋建莆田人

邑侯尹允先 茶陵人

邑侯楊廷槐號祖植錢塘人

邑侯周起元號綿貞海汀人

邑侯錢中選號玉虹長興人

邑侯馬鳴起號劬思龍漢人

邑侯余文龍 古田人

邑侯林宗載號亨萬同安人

邑侯傅元初號子詔晉江人

國朝

邑侯晏維嵩號中立金定人

邑侯蕭蘊樞字持大孝感人

邑侯王臨元號戒初聊城人

邑侯張齊仲號砥輯陽城人

邑侯李 濱號治宣仁和人

邑侯沈嘉徵號懷清山陰人

邑侯楊文灝號竹亭萬全人

邑侯黃繩 先號墨坊鄆縣人

邑侯黃 泌字景郭代州人

邑侯黃公生祠在縣治西祀明令黃應坤金達記之

記曰先是令浮者有以福澤於民民亦義於必報故當其  
去民或留衣冠樹碑記德以識不忘然此皆在於春月三  
年之後未有涖政未久而民祠而祀之者也我健所黃公  
以今年二月拜天子命來治吾浮僅九月即以內艱去於  
是民悲泣不勝感不忍舍相率即治之西偏建祠祀公公  
感民何以至此蓋浮民不蒙安靜之福久矣而上之人乃  
以浮之俗為驚悍難治良可慨也公青年宏才且為貴公  
子最爾小邑煩公經營孰不慮其不易近哉公不鄙夷吾  
民下車即率先儉約汰靡費及諸冗役士大夫東西行過  
是者捐俸入為之餽不毫髮累民或公出革自里供帳而

親糧自為之備自奉之薄人弗堪焉民有訟公進之膝下俾盡其言徐以理曲直之未嘗感辱聽狗私情有所出入是故垂白扶杖能道往昔事者相見論今之賢否均曰清廉之守正直之操數十年來未有如公者也他如重學校以敦教化立保甲以厚風俗建倉社以備荒歉戒徒隸不使入鄉革書美不使弄法善政縷縷悉公愷悌之心發之非如他令務赫赫之名以自炫者然則公任雖未久而其惠愛乃長子孫者所不逮瘡痍困憊民得以樂生興事日煦煦焉享生養安全之福非公賜而誰賜哉生祠於漢之于公後如杜軫荀崑陸雲狄懷英華炳炳於晉唐宋間我浮猶此行之固非有所私比以說說乎公亦非公之所

屑者心心相感殆非偶也雖然公豈無所本哉公之先大夫鏗初以蘭溪令徵拜御史逮後見沮權勸左遷濱州濱人木而祝之遺愛在民兩世一轍人謂公家學有源治民有譜信不誣已郡志列鏗名賢有曰正直立朝白筆褫權奸之魄存心愛物甘棠繫黎庶之思公繫民之思有日矣由此陟臺諫立朝端諒必能為天下作福而於前有光名勒鼎彝可卜也獨浮祀乎哉祠成王廷輔等屬余記之余不能文姑述公神化之速以告後來者公歛人名應坤字惟簡健所其號也起家戊辰進士

張中丞廟在東隅祀唐張巡嘉靖廿一年知縣汪宗伊修之歲分廟在東隅舊傳即太歲之神永樂天順宏治間累修建



邑人戴喟有記今逸

東嶽廟在西隅今營署建其左

茅司徒廟在縣治西門外按搜神記顯應司徒茅許祀將吳

五姓存曰居揚州結為兄弟能除虎患今無考又神降筆

自謂蓋漢茅容云

汪王廟舊名廣惠在縣北郭良方迎春起於此神諱華欽人

隋大業後守欽鏡等六州地十有七年保寧郡境武德四

年籍土歸唐封越國公宋元加王爵載祀典民德之廟立

周大夫廟在北隅朱伯雄有記今逸

陳大夫廟在北隅久廢

三閭大夫廟在縣溪東祀楚屈原

昭忠祠在

西隅

楊家園地祀明忠烈孫公忠節許公閔文振有

記今廢記亦逸按忠烈公巡撫遂忠節公按察副使遠也

清源廟在畹祀秦蜀郡太守李冰即華陽國志謂作石犀五

頭以壓水精元和郡國志謂立祠灌口者宋時邑人李涇

使金資神之祐因立廟

師主廟在埕都祀晉趙慨明邑人詹珊有碑記

記曰先王之制以人事神有典禮有秩祀不渎以非義祀

不加於罔功故有功而祀禮之經也人以誠通神以義格

驩響駢洽祥氣休邑交孚之道焉斯福利所自生而國家

之所慎焉者也吾浮景德鎮宜陶取以上供宋賦之民元

掌之郡刺史而收以權官至我朝洪武末始建御器廠督

以中官洪熙間少監張善始祀祐陶之神建廟殿內曰師  
主者姓趙名慨字叔朋嘗仕晉朝道通儉秘法濟生靈故  
秩封萬碩爵視侯王以其神異足以顯赫今古也成化間  
太監鄧原賢而知書謂鎮民多陶悉資神佑乃徙廟東門  
外通衢東北百武許以便祈祀即今所也天天地間生育  
民物惟五行五行之運各有神司陶司於火取成於烈燄  
燄燄之中人奚容其力非神之功其曷能濟雖器以供上  
朝廷之福既宜無俟於神然百神効順報功以祀國典所  
不廢也乙巳年代巡陶公奉旨制大器嘗以憂感遣官致  
祭命加修葺乃今復圯墮神用弗妥郡通陳公來督陶事  
謁廟顧瞻慨然興感乃召鎮民有事於官者語之曰廟宜

改作遂捐俸為倡授以指畫宜令致期務盡美善用仰副  
國家重陶之德意董事者承奉惟謹各相以資鎮之民間  
風樂助者不待會而集於是庀材鳩工量庸計役經始於  
甲寅之秋繼以節推康公通守嚴公次弟其功歲庚申推  
府錢公繼董其事亦捐俸畢務崇廣視舊有加廊廡門祀  
整秩宏壯奐奐如丹堊煥如嚴恪肅齊昭答皇上至德  
之及神靈佑助之功而二公體國之誠不於是見之乎先  
是乙卯之歲鎮諸耆長屬余記時以厥功未竣茲既告成  
復來丐言爰記其略以垂不朽若陳康嚴錢諸公後先相  
繼法宜併書

長沙王廟在上西都祀漢吳芮與其將梅鎬令鄉人增祀

明王守仁孫燧許達

闡帝廟在鎮市都祀漢闡帝

葛儂翁廟在上義都楓林共祀三國葛元舊傳祈禱有應

越國公廟在梓舟都桃墅康熙六十年修邑人汪堧有疏

汪堧重修越國公廟疏 唐越國公起範孤落魄之中

以義俠重閭里因隋獨夫亂且亡朔詔不通手刃逆臣張公不得已為眾所推攝歙州刺史拓地宣杭睦婺饒等州建號吳王威名振東南四境無警其勇畧可謂雄哉及夫日月既出親葵感太白之異知天命有歸不煩一天不毒一人籍其土田兵民與之休息太平此其智賢於昧時苟利者遠也當唐時功臣若劉文静輩多不克善其終而降

王為甚公獨一心所事以忠勤顯於貞觀之世累官歙州

刺史左衛白渠府統軍忠武將軍右衛積福府折衝都尉

九官留守勳上柱國爵越國公食邑三千戶非其大節真

有過人者耶自唐初已有生祠在歙州廳西後刺史薛邑

徙於烏聊山因歎唐亡八百餘年而公祠至今不絕歷宋

元明晉爵信順顯靈英濟廣惠王昭忠廣仁武烈英顯王

戴在祀典廟食幾徧東南六州所在皆有蓋其仁愛尤在

六州矣嗚呼何其盛也余族固公苗裔舊有廟祀事頗隆

今稍稍傾歛矣不有創者何有修者雖大宗小宗之法始

祖先祖之祭不敢強為之說然禮時為大公之廟自六州

而東南且然况其子孫也哉書曰若考作室既底法厥子



乃弗肯室知肯構又曰若作室家既勤垣墉惟其塗墍茨  
凡我族類是用競競而詢謀僉同或資或力願不日新之  
其做手於僧某香火存焉亦以見禮之因時者兼以神道  
事之云

寓將軍廟在常尚都神名磨邑人也黃巢之亂與弟聚率眾  
保守鄉人立廟祀之樂平程楷有記今逸

鄭司徒廟在騰鳳都神歛人兄弟三人曰傳曰政曰魯捍禦  
黃巢民賴以安立廟祀之

朱將軍廟在義合都祀朱遠金君鄉有記

潭口廟在北鄉祀尚書朱邵程克俊有記今逸

程氏世忠祠在景鎮祀陳程露洗以下諸人宋嘉定中勅賜

廟額曰世忠今移建縣治前

最高廟在城門都祀唐程尚書仲策

劉侯祠在景德鎮祀唐令劉仲昭御史余翺有記今逸

五姓廟在浯溪都祀唐呂瞻閔鏗及詹傳書楊先鋒林端端  
舊失名沈志考正五人以同討黃巢至浮梁寇平因家焉  
子孫共立廟祀之

汪樞密祠在居仁都龔村祀宋汪澈

風火神廟在景德鎮祀明邑人童賓督陶使唐英為之傳雍  
正間修廟總管年希堯有記

唐英火神傳曰神姓童名賓字定新饒之浮梁縣人性剛  
直業儒父母早喪遂就藝浮地利陶自唐宋及前明其役

日益盛萬厯間內監潘相奉御董造派役於民童氏應報  
大族人懼不敢往神毅然執役時造大器累不完工或受  
鞭箠或苦饑荒神惻然傷之願以骨作薪勺器之成遽躍  
人大翼曰啟窰果得完器自是器無弗完者家人收其餘  
骸葬鳳凰山相感其誠立祠祀之蓋距今百數十年矣雍正  
戊申全街

令督理城垣來厥涓吉謁神祠顧瞻之下求所為麗牲之碑闕  
焉無詞問神姓氏封號卒無能知者而浮志亦復不載最  
後神裔孫諸生兆龍等挹家牒來謁牒稱神曰風火仙詳  
死事一節并載康熙庚申午臧徐兩部郎董製陶器每見  
神指畫呵護於窰火中故饒守許拓祠地加修葺焉牒首

有沈太史三曾序曰先朝嘉號而勅封之不知所封何號  
也豈即所謂風火僊耶夫五行各有專司陶司於火而加  
以風於義何取且朝廷錫封之號如金冶神土木穀以及  
嶽瀆山川皆曰神未聞曰僊也豈相私稱云爾耶勅封之  
語殆不確耶是皆莫可考也當神之時徭役繁興刑罰滋  
熾孰不趨趨瑟縮於前而涕泣狼狽於後神聞役而趨趨  
而盡其力於工則已耳物之成否不關一人器之美惡非有  
專責乃一旦身投烈燄豈無妻子割舍之痛與骨肉煨煉  
之苦而皆在不顧卒能上濟國事而下貸百工之命也何  
其壯乎然則神之死也可以作忠臣之氣而堅義士之心  
矣神娶於劉生一子曰儒神赴火後劉苦節教子壽八十

有五儒奉母以孝聞

年希堯重修風火神廟碑記器莫大於飲食之制然率不外乎五行之寓質而融凝以水火之濟蓋自汙尊杯飲之風邈華而范金簡而棘木禮之升降亦與時相沿會者也若陶之為用則猶其樸焉者而後世之以窰名自唐人或始見之扁詠洎乎宋代方專其制以奉太官之用今可考而知者於汴有汝於杭有修內司其他之規模乎此與別出其奇以矜能者殆未可以一二數是皆致精於物力而成之弗患苦麻蓋無所謂風火神者有之自明之季世始考神實姓童氏嘗職窰為業當前明神宗時閩人督窰事弗就數困辱操作者神舉身躋焉而後器成如志由是成神

而奉之而鎮民之盡心於肝鬻者若有所默相焉祠在官廨門內之東邊解固前代所傳也則神嘗祀之於官矣余自丁未之歲曾按行至鎮一過祠下越明年而員外郎唐侯銜

命來偕余董其事工益舉而制日精一歲之成恒十數萬器而遂擇色幽由江奏淮咸萃余之使院轉而貢諸

內廷悉中程式唐侯節公財惜人力以微惠歸美於神時來修祀則俯仰上下歎其棟宇祀級之弗葺也因鎮人之志慨然倡以先焉而請余文紀其畧余長其任弗敢辭余惟

聖人在上則器無奇說而物盛氣厚則百工之事咸精其能庶司庫吏有所與作惟思宣泰上德以逮於下若恐弗及如



今之鎮人所以趨赴於唐侯者非有所督於前而繩於後也而其事集而功倍出於法而維急者當相什伯宜其神之靈響樂為昭答而唐侯之汲汲於是知非徒祀事之光亦將有以風乎後也是則可書也已若神之譜系里居與夫建祠之緣起或自有傳記余得而畧焉者也

鄉飲酒禮

定例鄉飲酒禮儀京府及直省府州縣每歲正月十五日十月初一日於儒學行鄉飲酒禮前一日執事者於儒學之講堂依圖陳設坐次司正率執事習禮至日黎明執事者率牲具饌主席及僚屬司正先詣學遣人速賓饌以下比至執事者先報曰賓至主席率僚屬出迎於庠門之外揖入主居東賓居西三揖三讓而後升堂東西相向立贊兩拜賓坐執事者又報曰饌至主席又率僚屬出迎揖讓升堂拜坐如前儀賓饌介至既就位執事者唱司正揚觶執事者引司正由西階升詣堂中北向立執事者唱賓饌以下皆立唱揖司正揖賓饌以下皆揖執事者以觶酌酒

授司正司正舉酒曰恭惟

朝廷率由舊章敦崇禮教舉行鄉飲非為飲食凡我長幼各相勸勉為臣盡忠為子盡孝長幼有序兄弟恭內睦宗族外和鄉里無或廢堂以奈所生讀畢執事者唱司正飲酒飲畢以解授執事執事者唱揖司正揖賓僕以下皆揖司正復位賓僕以下皆坐唱讀律令執事者舉律令案於堂之中贊禮引讀律令者詣案前北面立唱賓僕以下皆立行揖禮如前讀畢復位執事者唱供饌案執事者舉饌案至賓前次僕次介次主三賓以下各以次舉訖執事者唱獻賓主起席北面立執事斟酒以授主主受爵諸賓前置於席稍退贊兩拜賓答拜訖執事者又斟酒以授主主

受爵詣僕前置於席交拜如前儀畢主退復位執事者唱賓酬酒賓起僕從執事者斟酒授賓賓受爵詣主前置於席稍退贊兩拜賓僕主交拜訖各就位坐執事者分左右立介及三賓衆賓以下以次斟酒於席訖執事者唱飲酒或三行或五行供湯又唱斟酒飲酒供饌三品畢執事者唱徹饌候徹饌案訖唱賓僕以下皆行禮僕主僚屬居東賓介三賓衆賓居西贊兩拜訖唱送賓以次下堂分東西行仍三揖出庫門而退

三賓

屬鄉

別業

二賓

正目

一賓

主

僕

鄉飲酒禮圖

大賓

一賓

業紳

二賓

介

三賓

聚賓

別業

順治初令京府及直省府州縣每歲舉行鄉飲酒禮設賓  
僎介主酒席於存留錢糧內支辦凡以申明  
朝廷之法教叙長幼之節遂為定制云

乾隆二年覆准嗣後鄉飲酒禮酒席坐次悉依定式陳設  
并刊刻儀注臨期分給賓僎執事人等遵照行禮其應讀  
律令即開載於儀注之後令讀者照例講讀其在省會令  
督撫委大員稽查監看其各府州縣亦令該地方官實心  
奉行如有違條越禮者依律懲治又鄉飲之典重在賓僎  
得人方可以示觀感而廣教化若該地方官徇情濫舉固  
屬不職乃亦有實係舊德兼優之人而一種不肖之徒於  
未舉之先設計需索及舉行之後又復索贖求疵聲言冒



濫希圖訛詐以致人皆視為畏途而地方官亦多瞻顧每  
不舉行致曠大典應令該督撫通行嚴飭嗣後所舉賓儀  
務擇齒德兼優允協鄉評之人如地方所舉冒濫題叅議  
處倘所舉得人而不法之徒藉端生事需索訛詐者嚴行  
究治

中華民國廿四年七月七日 敬謝

抄

2808

